

四庫全書

集部

欽定四庫全書

濟南集卷四

宋 李廌 撰

五言律詩

方竹杖和功遠

性稟方外正人憐節瘦輕持攜防水潦殺活奈山精直  
以中圓稱名因義類清若將靈壽比未可賤書生

同張公碩梅耕道訪董畸老郊居

白水弄青秧晨煙著柳行  
羈懷正飄泊陂路轉微茫蘋

際鷺鷥下膝邊菱荇香相從尋勝事蕭颯興何長

瀝水官橋路將軍甲第新綠沉間結鏞柴几淨無塵下

榻喜賓至問田憐我貧相逢便傾倒晚歲定情親

青雲兩高士肯伴老夫游方駕相追逐通宵復獻壽詩

書嗟失計農圃話良謀日後耦耕伴懸知總白頭

秋菊

春花富紅紫黃菊與秋宜風勁幽香怯露晞寒艷滋孤

標雖獨步呈秀此何遲欲待羣芳歇專榮占一時

秋郊

郊原千里望好是暮秋時欲盡登臨興惟應杖屨宜鷄  
鵬方得意燕雀彼焉知黃犬蒼鷹去誰家年少兒

出城

岸走舟安穩逍遙若步虛晴烟迷白鷺春水見浮魚桑  
樹連坡種人家夾水居年豐村舍好稚子學詩書

秋山

山色帶晴雲雲山遠莫分寒林迥蕭散秀氣自氤氲定

有丘園士彼同麋鹿羣  
弓旌訪巖谷誰為上方聞

寂歷古關道二首

寂歷古關道早秋生曉寒  
空濛朝雨細憔悴客衣單  
事逐煙鴻遠情隨雪鬢閒  
蕭蕭倦游意天際路漫漫

寂歷古關道曉煙寒未分  
愁情滿秋草歸思隔黃雲  
客路自多感宿酲猶帶醺  
蕭蕭倦游意况乃久離羣

秋鶯詩

秋日生春意林間聞曉鶯  
奈何時序晚不及候蟲鳴  
搖

落無多感芳菲會滿城好音宜自默反舌可無聲

秋扇和之道

過時悲既往適用復相先世事夢生隕人情月晦圓寒  
涼非爾適衰歇豈余捐歲事待秋歛農夫期有年

續題郭功甫詩卷

詩道今蕭索騷人古困窮夜寒金殿冷秋靜蜀闕空  
隸縻宛馬壇巫誅守宮採珠探水府絲黍慎蛟龍

戲贈史次仲

世俗匪吾謀嘉篇常見投舊交皆炫曜夫子獨淹留禮  
樂尚虛器衣冠何自囚祇應涼冷後蕭颯更清秋

秋曉

秋色已飄零淒淒曉更清蕪城宿殘靄雲日遞微明瓦  
冷寒霜色庭空槁葉聲悲歡更盈耳簫鼓和鐃鉦

青泥雪中 和德麟韻

君笑吾癡絕吾知自不癡遠游陪勝士歸橐有新詩笑  
覺山途近寒因酒力遲相從畏嘲謔別後復懷思

秋蝶

粉蝶爾何知秋深尚戲飛憐渠迷節物猶若弄春暉露  
葉今非昔霜叢疇可依籬邊菊無幾薄命寄餘菲

宿路北

晚日明青嶂春風送馬蹄數朝秦嶺北今夜洛陽西禁  
水綠波滿蕪城碧草齊客心歸更速解轡恨棲雞

分題得古香爐

分韻得  
遲字

質為浮休棄形惟好古宜埏陶異甕礫香火近神祇冷



暖非恒德興衰彼一時舍茲何所適爾意勿遲遲

和次仲硯詩

聞道端溪好疑應為土風彼人非博識此語未為公野  
客雖云美才華恐未同濡毫滋墨外文渙亦徒空

秋溪

秋溪已澄徹山色貯溪中雲度前洲白霞生別嶠紅波  
瀾寒自鑑魚鴈共遊空棄置功名念羊裘作釣翁

釣臺

釣國固有術直鉤寧漫勞吾常鄙龍伯豈復羨琴高濯  
足風波地遊心虎豹韜誰云無是子天下自囂囂

此地有天險雙臺千仞岡眼寬知世窄望極使神傷慘  
澹諸峯立縈紆一水長振衣懷古罷新句入斜陽

秋風

萬籟靜中起扶搖風怒號半天鳴劍戟平地卷波濤鷗  
退宋都疾鵬搏溟海高賀蘭吹不盡何用戰蓬蒿

陸龜蒙有

戰秋  
詞

范蜀公挽詩十章

蚤歲青雲近英聲四海馳能懷天下寶獨讓月中枝既  
已登龍坂咸觀入鳳池如何老清禁偃蹇卧明時

公禮部第

一不效前人  
廷試乞起等

仁人宜有勇無欲故能剛凜凜回天力危危極諫章一  
言扶日御萬古正乾綱首犯龍鱗意淵衷亮未忘

首乞立嗣

慶寧雖首議濮廟一何公君子初無黨賢臣惟盡忠死  
生全大節社稷倚元功疾彼梁丘子依違祗尚同

公力爭濮

廟

荆舒昔未懲抗疏誓身爭衛鞅雖難屈桑羊屢請烹危  
言知不用脫屣謝浮榮豈戀三台近全無萬世清

直氣犯荆舒承明下玉除禁林餘諫藁蜀道擁安車自  
謂三宜去吾知衆莫如誰為忠義傳事事舉堪書

王荆公自

為制落  
公致事

嗣皇思故老趣詔侍筵經駟馬空頻駕高鴻本自冥蒼  
生雖絕望盛德愈流馨出處俱全節輝光並日星

元祐  
天子

起公侍  
讀不起

關雎久盈耳魏闕亦游心不廢江湖樂親調鐘磬音九

重初擊拊千代正哇淫器在人忘矣哀哉淚滿襟

公奉  
詔脩

新樂

重望晉隨會清明越大夫忘身安社稷寄傲老江湖黼

冕固已遠黃金猶可模旌賢宜異數願上孝宣圖

八十雖云壽吾嗟未及期方之昔衛武猶不至期頤幸

處仁人里叨膺國士知空餘戀軒想况復九原悲

衆樂西南圃從公數共游清無馬融帳榮預李膺舟河  
漢德星隕山川英氣收孤生築場意索寞向新丘

光祿朱卿挽詞

十首

自信仁由已深知道滿門才華輝日域嘉譽達天閭坦  
腹方趨進亨衢逐駿奔欲令唐晉後不獨美姚溫

要路多知己期公集有庸行趨青瑣闥榮拜紫泥封帝  
室常虛席侯邦久卧龍空餘遺愛頌安得鏤斯鏤

省寺官聯貴曾升社稷臣雙瞻觀日月接跡望星辰錫

爵雖開國封侯未富民天扉如可到直擬問通津

南國舊書生今誰老更榮朱轡頻補郡白首到名卿牧  
守惟司命官曹任老成道孚姑已矣何患不聲名

疇昔始龍館能聲到海隅兆民方菜色境政獨蒲盧尚  
賴德彌邵安知今也無猶聞江左郡荒政徯來蘇

七十古云稀公忠況未衰言常思悟主老更惜明時雪  
髮丹心被君恩寶劔知如何天不慙直道竟何施

樂圃林泉好藤蘿蔭古臺仰攀高節處豫約掛冠來涼

月空堂影新霜百草萎清行樂地履跡滿蒼苔

滄海夢悠悠關河壯氣收魂歸傷委蛻壑迴失虛舟月  
暗菰蒲夜山空木葉秋可堪頻悵望松梓繫新丘

五十雖非壽休嗟不慙遺賞延姑可待子貴竟何遲異  
鵲驚蟬蛻淒風落木芝乘驄千里客歌罷不勝悲

蚤悟多金累惟修儉與仁考終雖罔愧直道未容伸地  
想流謙德天惟賚善人昭昭錫繁祉餘慶在振振

賀蘭先生詩同陳恬叔易和節度使王漢忠韻



陘隘區中世殷勤招隱篇應居小有洞幾見大椿年菴  
廢雲埋谷琴亡聲在泉至言曾悟主持此合昇天

菴臺在嵩

山承天觀  
鳴琴泉上

顏魯公祠堂詩

竭來游汝海初識魯公真盛德宜蒙祀英姿儼若神典  
刑雖異代勛績在蒸民憶昔艱難際生逢歷數屯羯胡  
來薊漠戎馬度咸秦河朔皆朝虜平原獨挺身蠟書通  
帝所羽檄論邦鄰許國心無二孤軍氣復振弟兄同義

烈生死劇酸辛已怪酬庸薄那聞左降頻江湖銷歲月  
省闈悟經綸相國心多忌軍容憤復伸同朝緣妬媚陷  
賊俾遭逃輒墮姦邪計剛期跋扈馴啞凶令履尾納諫  
為嬰鱗假手雖云智擠賢太不仁茹羶蘇武餒決背蘭  
生嗔誤問長安使寧為叛將賓一時全大節千古仰清  
塵緬想神如在推遷跡已陳謀謨存汗簡字畫徧蒼珉論  
世吾求友之人德可親詎云黃壤隔猶勝白頭新端欲  
希忠義常期齒搢紳今雖逢聖旦止願作良臣惟冀尊

王室寧思秉國鈞儻令冠獬廌猶可畫麒麟古寺今如  
昔泉扃夜不晨何人同李翰紀事比張巡感慨瞻遺像  
潛然淚滿巾

程高承議赴夔路轉運判官求詩

聖主躬仁政羣方布詔條洪恩溫海嶠嘉頌滿芻蕘聚  
斂除姦吏依違屏具僚鈞衡無碩鼠城社絕餘妖皇化  
思無外王心遠欲昭咨詢黃閣老選命紫宸朝丹禁傳  
天詔飛星下使軺書旌分蜀道攬轡步煙霄急峽瞿塘

險孤城白帝遙巴山連浪遠漢節拂雲飄按部清時好  
觀風樂事饒詩成思老杜鬼哭想殘蕭已佩黃金印當  
簪七葉貂不應淹僻陋從此上扶搖

上翰林眉山先生蘇公

佑聖生賢佐天心在撫民昌期膺治運穀旦降元臣四  
序功成晚三台耀拱辰嚴凝氣剛勁謇諤性忠純凜凜  
風霜操優優雨露仁高才映今古妙學洞天人黼黻文  
華國淵源德潤身四朝師令望百辟仰清塵射策明三

道觀光耀九賓咸知帝賚說復誦獄生申視草金鑾殿  
登庸鳳詔春夔龍名不隕魯衛政相因交蔭槐陰茂聯  
華棣萼親廟堂熙帝載袞繡並天倫政柄勞無憚侯邦  
逸久均偃藩心固樂調鼎味宜新上宰虛黃閣除書下  
紫宸百神懷景福萬化入鴻鈞陰德施黎庶休功格昊  
旻自當侔帶礪詎止約松椿賤士晞高躅趨風愧下陳  
願言千萬壽獻頌敢辭頻

小蘇先生九三丈自司諫拜起居郎權中書舍

人薦作詩以賀

孝治依文母皇圖錫聖王虛心思啟沃妙選盡忠良近  
侍崇儒術先生被寵光周邦柱下史魏闕紫微郎禁殿  
聯常棣天池浴鳳凰揮毫青瑣闥簪筆御爐香德鎮千  
鈞重文輝萬丈長昌時逢式穀吾道喜彌彰視草嚴宸  
幕論思子夜央槐邊星轉角花底鶯分行豈但居華省  
行聞上玉堂終期袞衣拜慰此士夫望

贈錢之道子武昆仲

青冥聯翼鵠志節傲雲機凶變家多難年荒歲愈飢運  
乖生事拙貧病壯心違蚤歲憂虞少今春弟妹歸氣悲  
縻駱馬心感動搖徽

徽旌識也

命矣無傷已時哉歎式微自

從中夏瘦半減去年肥氣槩摩天驚文華耀日暈飲川  
容鼉鼠障日讓犁犂南畝時躬稼虛堂晝掩扉有秋緣  
力穡高節本知幾路入東城遠人行北道稀樹頭雲藹  
藹草際蝶翻翻古岸連樊圃秋城秀巖薇斷洪流淖淖  
獨木過歌魏穠稌香紛馥菰蒲綠映園訪君非旦旦相

見亦依依為問奚為樂言他復謂諱孝思誠辟色僚隱  
始深譏不見前賢者何嘗慮世非浩歌行拾蕙雪詠浴  
于沂儼雅誠詩社淒涼近釣磯夜階鳴蟋蟀秋砌響蚍  
蜢竹塢留殘月林虹帶落暉龜翻朝露葉魚動落蓮衣  
詩句時評品曹劉幸發揮鮫人龍頷寶海客蚌胎璣子  
意將全美余心久所睇衆人皆捲舌高論獨其頎掩月  
蟾蜍泣飛霜蕙草歲鯨魚翻海濁水碧帶魚飛正可夷  
嵒岱公何愧隱扉剛明文豹節升降二龍旂月滿星藏



彩霞升燎有輝愁  
魔攻肺腑危坐復  
歔歔

七言律詩

和楊元忠主簿觀魚

輕瀾沔滿帶維舟  
新雨羣魚藻際浮  
既亦非知梁上樂  
敢嗟彼有釜中憂  
漢江水濁斑衣獺  
楚岸烟深雪色鷗  
未作金鰲莫驚惕  
月澄清海漫如鉤

過昆陽城

昆陽城下黍苗稀  
寂歷荒墟隱翠微  
遠想龍蛇方鬪野

解驅虎豹使成羣鳥知將擁河流斷定喜能令屋瓦飛  
白水真人今物化春陵惟有荷鋤歸

和錢之道遊虎丘二首

輕雲細雨放花時才過清明已夾衣拚得酒時教盡醉  
可題詩處莫空歸丁寧鶯語機關巧輕薄楊花氣力微  
閭闔晚來行客盡稚烏相趁入城飛

石頭槎牙占官道松樹老怪枿斷雲驪龍睡隱潭水黑  
雨積糞壤生朝菌山光繚繞林樸樾野氣空闊雲氤氲

歸來月落天色莫水邊游女濺紅裙

商高宗陵廟詩

築巖胥靡繼甘盤此道寥寥不復存古廟秋風塵黯黯  
故陵烟樹月昏昏君臣難遇真千載岸谷誰知舊九原  
魏尚端能似頗牧獨無新夢到天閭

厄臺

今古俱無忌憚情厄臺猶敢尚為名裔孫不復重瞳聖  
俗目俱同瞽叟盲

陳舜  
之後

見愠仲由空骯髒膾肝盜跖尚

彭亨聖人道大故難用誰聽弦歌兕虎聲

宿大賈村僧寮

行過橫煙香靄中  
低低茆舍繞蒿蓬  
磨門見客僧如鹿  
席地圍爐火自紅  
隙壁射床千里月  
破窓吟紙一川風  
僕夫密勸休安枕  
聞道穿窬是主翁

哀都官王申

壠上弓旌降鶴書  
戔戔壁帛賁鄉閭  
漢宮入奏賢臣頌  
蜀道榮觀駟馬車  
誰謂諸侯老賓客  
歸來華髮伴樵漁

泮宮陳迹神游否絳帳門生多石渠

大雨中遊嶽寺

忽見微雲別嶠生急緣危磴下崢嶸勢傾海岱千巖黑  
力卷江湖萬葉聲碧瓦依稀人暗喜急湍湍漲馬初驚  
老僧宴坐朱門底應笑狂夫冒險行

鏡屏詩二首

曲玉回輝瑩可觀秋冰壁立動涵瀾每嗟許國酬身晚  
忽覺餘光照膽寒映座未容華表客整簪空慕鷓鴣冠

雲車一去橋山晚寶鎮于今下古壇

凝澄不動水淵槃風拂泉生或細瀾月影透簾朝日薄  
龍輝繞匣夜光寒玄冥借魄知神物男子無聞已弱冠  
照我精誠至麟閣緩隨弓劍上仙壇

和二兄書事三首

諱遼字國器居蘇州時瘡疾未平

年少看書恥未多壯心今歲沛中歌帶江黃幟有蹻跣  
舉國白頭無絳何為我忠謀能有幾匪人阿比敢言他  
手攀荆葛藤蘿近敢把新涼取次過

逋逃內潰古云多楚塞羣雄尚感歌血饗彼猖神苟幸  
廟謀非壯士誰何將軍威信當詢衆決勝神機豈謂他  
試把香囊問少子淝川投策夜潛過

功名於我實何多祇為浮華未浩歌兩月病疴誠已甚  
半頭白髮似無何詔惟選額將從衆學貴師心在匪他  
當世聞人知不少片言敢謂衆難過

和鄭十三東齋言事二首

為貧軒冕未忘情寧使棲遲抱六經安得神仙斷鯨劍

拂開雲翳露天青霧濃玄豹終朝隱水薄猜狐抵夜聽  
昏墊直疑皆飲鴆沉冥何苦辨清醒

春光故故惱人情新葺茆茨欲醉經積雨水衣龍領滑  
晚晴山翠佛螺青月邊柳色疎疎見風外梅花細細聽  
半夜白雲生石枕潤珠蒸濕醉魂醒

答孔渠處度見贈

我似羈縻遐徽州君如霸府大諸侯如何鼎食素烹飪  
乃謂溪毛堪薦羞駕馬但能追十駕鉉刀奚可斷千牛



鄙人粗亦知臧否敢謂東家故曰丘

嵩頂六月芍藥初發

誰言天地一無私底事陽和到頂遲暑氣已交五六月  
雲中初見兩三枝可憐下土炎蒸日却是青霄爛漫時  
第有榮心莫嗟晚物情先盛復先衰

和人寄寇昌朝韻

久料騰驤空冀北如何留滯困周南聞君載酒訪狂客  
把酒為君當劇談上國分攜今已久丹砂未就我懷慙

六蜚駕馭須天馬吾恐驂騑備兩驂

楊十三虞卿在希顏上人房納涼余時在村舍  
歸和諸公韻

土渴山焦獨在阿考槃孰與世相過皇皇夫子猶傷鳳  
碌碌蒼生尚執柯頭白已驚為學晚

余十九歲  
頭近半白

日長羸

得讀書多北禪釋子應相笑樹瘿多年變木鵝

曉行聞鶯

花梢未動雨中聽催徧園林百果成六月不知春色盡

五更來伴夏雞聲樹頭蕭瑟長風過馬上夢驚  
勸汝無言歸舊谷先秋審次候蟲鳴

雨中游法王寺詩

雨脚如麻未肯收雨中還作法王游雲埋輦路煙初合  
水濺松巖雪亂流心畏險途常恐失寒侵病骨已知秋  
羣峯聳峭猶無畏為語山僧不用留

少林寺詩

禪老家風古少林道場遺跡蔽烟岑山遮石脚斜陽早

雲磴鐘聲出谷深  
隻履度關天杳杳  
九年面壁海沉沉  
欲知苗裔能傳法  
栢樹猶明聖主心

習池詩

陳迹相推今古同  
池邊倚杖送歸鴻  
童山尚接千巖秀  
穉樹猶傳萬壑風  
春意物情迷野興  
水光天影共青空  
雍門有淚應承睫  
繞墓行吟弔習公

習郁死  
塋池上

次韻劉厚之久陰未雨

欲作豐年幾日霖  
密雲委地結繁陰  
莫疑造物收功晚

自是陽和著意深且具黃雞傾白酒更求青李與來禽  
掃除萬古窮通想付與南薰一弄琴

過閻氏橋亭

綠芰紅蕖照眼新池塘風軟起青蘋遠山碧映重林暮  
委徑香傳別洞春五月獨為長道客滄浪自有濯纓人  
誰知雅意在丘壑慚對箕蒿愧路塵

范蜀公得請再致仕蜀公作詩命某次韻

老戀林泉拒袞衣高山景行衆思齊久膺重任當先覺

獨以清風激衆迷越相家聲千載後商公舊隱白雲西  
坐令貪懦趨忠厚寄語狂童勿芥雞

謝王生贈弓矢

將軍材氣舊無雙老矣猶思強挽強金甌願乘千里馬  
玉關歸奉萬年觴受降城下沙場雪無定河邊木葉霜  
贈我良弓借餘勇君應真勝楚人亡

和人九日詩

三徑就荒陶令宅兩峯高並杜翁情悲秋不奈黃花好

落帽誰憐白髮生  
遠岫薄雲收  
細雨晚林丹  
葉弄新晴  
登臨俯仰寰區隘  
欲駕風輪更上征

表高氏石公之墓

黃金照地晉將軍  
劔履盈門萬石君  
獨以德名追遠裔  
盡將富貴比浮雲  
瑤田種藥期公壽  
夜壑移舟忽夢分  
彷彿平生阻瞻覲  
一詩三嘆漫殷勤

再上閭丘通牧少卿

東邦濱海帝憂勞  
慎迪名卿禮意褒  
板簡拜旌前憲掾

雲駢駢馭舊仙曹庭柯露下回春色夜浦珠還息海濤  
陰惠日隆天眷異蓬萊東去近金鰲

呂朝散挽詩二首

宗傑

殊重平生邴曼容退身能勇自為雄盛衰付與枕中夢  
福祿猶嗤塞上翁松菊漸荒三徑合鶴猿悞怨故山空  
蒼苔滿地塵凝席惟有蕭蕭蕙帳風

金馬玉堂高步宜中年遂與水雲期太冲早擅三都賦  
叔度難量萬頃陂夜壑藏舟今孰在白駒過隙事堪悲



南園從此無行跡老檜高松知未知

送黃集虛赴任知州

并序

故汝州刺史黃公辛余先君子之友也惡衆人之  
曲邪而以正直自立非士氣之偷懦而以忠義自  
任慨然與古人為徒而恥浮沉俯仰狗媚世習雖  
轉軼窮年動輒得咎而居貧守道愈困愈堅君子  
韙之始三子皆布衣公將致政一歲之中皆登仕  
籍君子以為為善之效果不終窮乃在其子孫也

吾友集虛公之仲子也志義闡奧其文行有公之  
遺風今將之官桐廬故作是詩送之以寓意焉  
桐廬古郡淞江東山色溪光藻鏡中後夜相思千里月  
高懷為寄一襟風欲紆龜紐黃金印且學羊裘老釣翁  
忠義傳家君勉勉清名不必問窮通

楊元忠和葉祕校臘茶詩相率偕賦

風駕已馳供御品霜郊未卷喊山旂七閩地產猶為寶  
兩府官高故不遺須藉水簾泉勝乳也容雙井白過磁

江南雙井用鄱陽  
白薄蓋點鮮為上

東堂退食公宮晚金鼎新烹欲沁脾

宋英寶宣德自杞至邑將復東還見遺途中詩

次韻和之以見惜別

思君仍歲此相逢後夜夢魂無復東白紵淚痕何處恨  
故園花信幾番風歸來可喜似新燕惜別預愁如去鴻  
老矣柰何春半老悠悠萬事付盃中

又過陳叔易隱居相拉同遊超化寺詩

文範今亡見嗣卿潁川應聚異時星清風特為吾曹至

畏景寧憂日御停踏雪曾穿東郭履移文今忤北山靈  
烹茶且酌南溪水第欠金山第二濡

再領玉局昔東坡在翰林作詩送戴蒙有玉局  
他年第幾人之句後自領外歸遂領玉局予復  
官亦得之坡今亡矣悵然有懷

東坡因地夙相親玉局終為繼戴人祿仕豈知承未軌  
恩光又許襲前塵青蠅附驥元非援白玉無瑕晚更真  
泉下有靈應首肯不隨凡劣易緇磷

次韻東坡還自嶺南

憑陵歲月固難堪，食蘗多來味却甘。  
時雨纔聞徧中外，卧龍相繼起東南。  
天邊鶴駕瞻仙袂，雲裏詩牋帶海嵐。  
重見門生應不識，雪髯霜鬢兩毵毵。

谷隱寺書事詩

雲如戲我舒還卷，雨似欺人去復來。  
學道忘憂從老至，持盃得意使顏開。  
驪駒喜飽嘶猶戀，獬犬誇獐吠欲催。  
三日山中果何有，賦詩滿得錦囊迴。

某與鮮于綽元勛共約同習制科

趙括癡兒漫喜兵他年自料困長平將軍各有萬人敵  
下士難先二子鳴盧駱楊王何足算江黃六蓼豈勞征  
英雄少貶雖慙愧且徇區區月旦評

謁中嶽祠

嶽鎮中天司下土名山宮殿鎖雲扃固知正直作威福  
豈徇往來惟醉醒封禪今無秦漢侈降生誰是甫申靈  
何當弭節朝雙闕一曲鈞天夢帝庭

諸葛菜 并序

蜀諸葛亮每行兵處必種此菜以志之邑中  
元開州家有此種僕求之以作羹甚美作詩  
求之

武侯戰地記他年戰後猶當似率然會向渭原驚仲達  
尚應江磧感桓玄背山左澤甘如彼傍砌繞籬今可憐  
莫問興亡進羹茹書生羸取腹便便

將至嵩山遠觀瀑布

晚晴紫翠溢平川三十六峰凝霽煙  
匹練依稀分秀嶺  
玉虹搖曳舞危巔  
寒光定是連明漢  
清氣都疑貫九淵  
可笑夜來風吹後  
亂溝斜澗亦涓涓

和人游嵩韻

嵩高峻極壓三川  
周視方輿見廣員  
絕頂固知天下小  
泰山為占海隅偏  
白雲散盡千林月  
急雨收回萬壑煙  
莫笑層巒高似岸  
舉頭一握是玄天

友人董耘饋長沙貓筍廬以享太史公太史公



輒作詩為貺因筍寓意且以為贈耳薦即和之  
亦以寓自興之意且述前相知之情焉

案此詩從薦鶚

宋詩紀事補載

節藏泥滓氣凌空薦俎寧知肉味重未許韋編充簡策  
已勝絲黍蛟龍短萌任逐霜刀重美幹須煩雪壤封  
他日要令高士愛不應常共宰夫供

遊寶應寺

案此詩從薦鶚宋詩紀事補載

雨後秋風入翠微我來仍值晚涼時山遮日脚斜陽早

雲礙鐘聲出谷遲故國空餘煙冉冉舊宮何在黍離離  
興亡滿眼無人語獨倚欄干默自知

賀小蘇先生

柱史承恩正紫微玉皇優詔碧雲詞欲知伯仲文章職  
對掌絲綸內外司雨露偏濃常棣萼煙霞常駐鳳凰池  
共扶吾道邪歸正同振斯文盛不衰白首並逢千載運  
登庸皆是十年遲靖共介福由神聽告爾多方代帝咨  
臚仕初逢賢者貴德名當問國人宜夷齊抗世清何早

元凱登庸事可期貧賤久思楊得意龍光今喜鄭當時  
應憐下客塵埃甚慙愧雷門獻此詩

崔先生所守甚高其為人表裏澹泊然其文晔  
如有自然之美可喜也因還其詩卷題其末

別久相思今見君近詩盈軸語彌新雄妍不用近時律  
溫厚初還上世淳少與多仇身踽踽樂天知命志申申  
才高所寓皆高趣氣古斯能似古人句有萬鍾辭祿意  
衣無一點污人塵中山可鄙魏公子谷口全如鄭子真

珍重遺音清廟瑟蕭條寡和郢中春誰同杜老知無敵  
會有君山謂絕倫白首定交雖自愧夜光投我豈無因  
欲知慰此無聊賴萬斛愁懷為一伸

五六七言絕句

二士石榻在中院之北巨石如榻有自然石枕  
可卧二士和大受韻

憶昔登封日山蹊困六飛我來猶舍杖共坐拂雲衣

茶藤洞

無華真國色有韻自天香  
臨風難自持為舞白霓裳

春日即事九首

藹藹花絮亂紛紛蜂蝶多  
今年春復爾不飲奈愁何  
新綠陰將就殘紅在亦稀  
雨中千點絮來伴落花飛  
怒風吹老屋急雨鬧空庭  
莫歎林花盡懸知隴麥青  
毛桃猶帶藥青杏已團枝  
老不禁春惱應知老易欺  
但喜朝朝醉那知夜夜風  
老人貪睡美春夢五更中  
化國有餘暇豐年多醉人  
典衣謀一飲對酒却慙春

悵望白銅鞮醉聽金縷衣花間愁落日老更惜春歸  
嬌馬寧馨郎羶車薄媚娘蕭蕭兩蓬鬢愁入少年場  
逃閒閉關坐忽有賣花聲老大自多感依然京洛情

雪

紙窗明眈眈雲日暗暝暝半夜寒添被清晨雪擁門

晚晴

微陽掛木杪孤鳥下雲淀廣墟遺稻梁鸛鶴伴鳬鴈  
陰壑留殘雪林虹帶晚霞孤煙障漁市不見兩三家

臨潁縣

日永行人漸困路長飢馬頻嘶驚起一雙白鷺背人飛  
向前溪

楊花詞三首

特地飛來有意等閑却去無情若比邇來時態祇應時  
態猶輕

全似秋空白雲不應日墮紅塵樓上何人遠望黯然無  
語銷魂

苦恨紅梅結子生憎榆莢悠悠解送十分春色能添萬  
斛新愁

夜坐

且喜屋無穿隙雪未愁漏盡滿鞞霜紙幃布被從牢落  
賴有希牙齒頰香

道中即事呈岑使君吏部次和德麟韻三首

日射西山爛爛光低雲遮岸水風涼從來鞍馬倦行役  
笑語不知岐路長



稻塍粟壠綠相連  
野老欣逢大有年  
人意物情俱自適  
溶溶佳氣滿江天

白叟黃童話使君  
買牛買犢諭邦人  
今年菽粟倉箱滿  
仁政常為七縣春

春日偶題寄友人

低雲不斷風仍急  
細雨無聲晚更稠  
千里思君常在眼  
黃昏天意自春愁

呂顏野飲醉中寄五絕句次其韻

醉鄉天地一何寬  
不問金壺與玉山  
暫得陶陶太古意  
醒來應亦惡人間

酒在盃中惟恐盡  
事來眼底只嫌多  
一壺醉倒春風裏  
萬斛窮愁奈我何

醉後詩成筆似椽  
客來傾酒酒如泉  
憐君常得酒中趣  
愧我經春只慘然

手持金盞灩斜暉  
目送歸鴻萬里飛  
還似習家池上日  
醉中倒載接羅歸

醉倒南山卧白雲滿天詩思不勝春黃雞白酒真堪樂  
誰道蓬蒿有此人

題孔氏東園三首

何處移來蔭菊花琢成玉葉靜無瑕天香不合人間有  
只是祇園居士家

桐已參天栢已蒼昔年曾見似人長樹猶如此人休怪  
賓主相逢鬢各霜

濃綠陰中黃栗留醉鄉遲日厭鳴鳩青春去後百花歇

賴有枝頭安石榴

題唐洲東寺訪友人不值詩

三年漂泊老荊州  
重過淮安舊驛樓  
地上謫仙天上去  
故來蕭寺想風流

眼前風景似襄陽  
松柏參天竹滿岡  
鷓鴣一聲春欲去  
雨催新杏漸嬌黃

漢陂

晴山如黛水如藍  
波淨天澄翠滿潭  
身在玉壺圖畫裏

心隨飛鳥過終南

失題

羨君走馬踏千山却笑吟詩不肯閒  
寫得清風入嘉句盡攜爽氣出雲間

吟袖衡雲滿筆端馬蹄霜跡破朝寒  
據鞍何必須橫槊自有新詩似建安

觀音亭

錢唐西湖三百寺芳草畫橋烟靄中  
寶陀大士本無相

一亭聊慰伏蛇功

綠鴨亭

澄波奔淪鴨頭綠秋水清於春水明菱裳已逐秋光盡  
藻帶暗藏春意生

竹亭詩

繞岡脩竹小亭深風榦雲梢照碧潯安得茂林帶左右  
祇應蕭爽似山陰

送元勛不伐侍親之官泉南八首

卷中識盡古來人  
筆下文章日日新  
萬里從親海邊縣  
要令南國見麒麟

君房言語妙知名  
元凱春秋癖已成  
作者風流公莫讓  
要令江海聽文鳴

看罷吳山看越山  
一帆千里玩風濶  
令人頗憶羊裘老  
為釣桐廬七里灘

解知身世兩鴻毛  
肯羨一鉤連六鰲  
有口惟宜醉醇酒  
時時痛飲讀離騷

梅雨晴時荔子丹絳囊青幄共檀欒按圖讀譜嘗珍品  
大勝關西首蓓盤

泉南南浦是南溟瘴霧熏人不用醒想對文書搔首罷  
刺桐花下學蘭亭

甌閩接壤氣多同只恐泉南有颶風掀虹見時定翻海  
禦寒裘褐要重重

粵藤玉板澤於脂歛嫫媿隄靡理勝犀歸日錦囊詩幾許  
七閩當有數千題



送蘇伯達之官西安七首

好去西安蘇縣丞千年求友近嚴陵江山如彼君如此  
正似玉壺寒露水

湖山主人玉堂客爾來華髮故應多安石雖云江海士  
元元蒼生將奈何

苦憶君家兩惠連樓居應作水中仙靜看河畔青青草  
應有池塘春夢篇

問訊東海秦釣客

秦觀從先生行

爾來聞已霸風騷緝明餌香

我知愧愧爾一鉤連六鰲

寄語松陵與太湖煙波風月爾何如故時景物應如昔  
復有當年張翰無

橫江一葦聽潮來江月飛霜落酒盃寄語錢唐江上月  
可憐寂寞照潮迴

千里隋堤榆柳風輕花薄莢正冥濛離情解逐仙舟去  
欲過三江震澤東

和陳恬思其叔子思有書齋在山中二首

古寺愔愔映夕岑  
谷風淒勁觸霜林  
曩時蕙帳知何處  
不見山人來苦吟

嗟我衰遲行老矣  
與君生死尚情深  
屈平賈誼何須舊  
敬弔先生淚滿襟

從德麟自中盧游靈溪記事

各執梅枝不執鞭  
涉溪穿竹過林煙  
景純夢裏經行處  
直到青溪古洞天

青溪翠壁瀉琮琤  
洞府猶傳鬼谷名  
幸有六經堪送老

不思唇舌慕從橫

裂崖泉射便成溪  
溪畔虛巖匹練垂  
玉濺珠跳千仞底  
陰陰衆木媚清池

次韻秦少章蠟梅

底處嬌黃蠟樣梅  
幽香解向晚寒開  
故人未寄嶺頭信  
先報江南春意來

德麟以書相招云  
已與潘仲寶在中  
廬可自鄮  
來同游靈溪石門  
雙池等勝處某作  
六詩率張

會川作

冰溪雪嶺赴詩盟  
我媿難先二子鳴  
莫憚登臨助餘勇  
欲令萬戰遇奇兵

靈溪閼洞鏢華胥  
地脉旁通分野殊  
莫憚登臨探奇險  
恐君他日亦藏書

千仞雲崖聳石門  
古傳此地聖凡分  
我曹自愧羣峯誚  
未必山靈解勒文

地上雲居有梵天  
碧池靈脈瀉雙泉  
不應勝地能埋沒

政欲因君佳句傳

雲外泉聲度碧林  
瀏紫累帶作清深  
吾纓已分令塵染  
欲借寒光去洗心

異時倥傯此時間  
甘在塵中可厚顏  
天為好山生勝士  
莫因便懶負雲山

題峻極下院列岫亭詩

早訝年年狂士來  
每來亭上獨徘徊  
山應又喜添知己  
去後山容似死灰

山色滿亭亭倚空與君俱在畫圖中  
解道龍騰青壁斷  
令人却憶漫浪翁

聖俞詩云絕壁龍騰青壁斷極天神降白雲空

筍籊筆詩

琅玕天矯排霄去  
敗籊平堦聊貯儲  
付與管城湯沐地  
何須毛穎號中書

雪中汎漢江呈德麟

漢江莽莽雪浮浮  
遠想山陰汎剡遊  
高興共成何更盡  
子猷安道喜同舟

將至鄮城和德麟韻

綠勝章臺楊柳街青羅斗帳淨無埃五株何用詩頻說  
安得韓公到此來

曉至長湖戲贈德麟

桐實離離秋帶長玉鞭驕馬度垂楊黃茆野店人爭看  
籬上紅眉粉額粧

和李端叔大夫從參寥子游西湖十絕

幾處鞦韆愁日暮一聲鶗鴂喚春歸紅稀綠盡尋常事



不用長繩繫落暉

草已芊綿柳已柔  
落花重疊不須愁  
風光流轉等閒過  
又是一年春事休

百物爭春竟可憐  
清池綠淨但沉天  
浮萍細碎從渠長  
憎見差池點荇錢

西疇新買數塍田  
便掃空園俟有年  
欲坐瓜菴吹豆葉  
風翻黃浪麥秋天

風頭皺浪開還促  
雨點圓紋亂更多  
何似無風亦無雨

碧天千里在澄波

癡兒插地栽楊柳楊柳無根插便生我亦無根常作客  
四年漂泊大梁城

股大如膏立已憂不須登閣始三休道人尊足元無病  
莫取形骸向裏求

夢為蝴蝶恣飛飛入花叢處處迷不是提壺強呼起  
尚應栩栩展江西

詩翁詩思與春爭落筆風雷紙上生雪棘滿願心尚壯

君看巖雷射人明

池南池北亂蛙聲不問官私處處鳴昨夜一犁新雨足  
無煩科斗更滋生

釣臺

竹岡深貯一溪雲溪灣路盡釣磯新魚鳥相忘自相樂  
使君元是狎鷗人

山東太白謫仙人筆捲天河氣拂雲百代公卿嘲哂徧  
清溪石上想嚴君

興王不患無功業  
賊亂常憂在歲寒  
能緩阿瞞移鼎手  
長鋌此日愧漁竿

中春

輕挨殘花香簌簌  
旋剥新筍白纖纖  
傷春煮筍買春酒  
短褐破碎人家嫌

春日風雨晚題

低雲不斷風仍急  
細雨無聲晚更稠  
千里懷人常在眼  
黃昏天意自春愁

王子立寄三絕句云常詣夏願吉卜云宜見君  
子子立作詩薦次韻

久依鳳翼與龍鱗  
萬里青雲可致身  
聖主求賢如不及  
夜光豈復怒無因

富貴自知當自信  
耆鮒福併固脩長  
陰陽可測非天理  
男子人知亦易量

三首新詩慰病軀  
萬金何必是家書  
隔年已有游嵩約  
玉趾何時過敝廬

寒食

案此詩從宋  
詩紀事補載

千株蜜炬出嚴闈走馬天街賜近臣  
我亦茅檐自鑽燧  
煨鍼燒艾檢銅人

飲襄陽沈氏家醉題侍兒小瑩裙帶

案此詩從  
宋詩紀事

補  
載

旋剪香羅列地垂嬌紅嫩綠寫珠璣  
花前欲作重重結  
繫定春光不放歸

興安道中雪晴見羣山偶成

關山千里湧銀濤  
晚日烘雲欲動搖  
滕六自知遷客近  
前驅一洗瘴煙消

雪晴

山凝秀色螺成髻  
溪走寒光珠在盤  
更欲呈姿作清巧  
暫粧梅柳雪中看

飛閣

飛閣凌波浮渺茫  
碧山白雲坐相忘  
好風歷楯泛我袂  
興來取纓濯滄浪

未曉出雙池小雪作

忽忽蓐食過重丘  
炬影通林見遠流  
雲物瀾翻煙幕歷  
細風吹霰上征裘

瓦廟

柱側簷歌瓦欲飄  
斷垣苔澁樹蕭蕭  
滿庭荒草無香火  
惟有禽聲伴寂寥

詩餘

虞美人



玉闌干外清江浦渺渺天涯雨風如扇雨如簾時見岸  
花汀草漲痕添青林枕上關山路卧想乘鸞處碧蕪  
千里思悠悠惟有霎時涼夢到南州

菩薩蠻


雙松庵月  
夜賞梅

城陰猶有松間雪松間暗淡城頭月月下幾枝梅為誰  
今夜開罇前簪素髮自擁繁枝折疑是在瑤臺寶燈  
攜手來

清平樂

送別

落梅鳴咽暗淡城頭月吹滿江天驚夢蝶喚起畫樓傷  
別簾風輕觸銀鈎梧桐玉露新秋底事瑣窗深夜素  
蛾常伴人愁





欽定四庫全書

集部

濟南集卷

五

詳校官庶吉士臣汪彥博

侍讀臣孫球覆勘

膳錄監生臣李光緒  
膳錄監生臣汪麟

欽定四庫全書

濟南集卷五

宋 李廌 撰

賦

藉田祈社稷賦

王者躬藉千畝治農上春載耒耜之稼器祈社稷於元  
辰播種始修願備粢盛之實告蠲昭告虔恭土穀之神  
蓋以藉是天田借失民力躬稼雖勤於率勸陰相乃臻  
於蕃殖吾欲宜物生之理故控誠於社稷載耕一塢敢

違東作之時欲致三登實賴柔祇之德春既應候物將  
發生農祥正兮隩者析土膏起兮勾者萌田既有藉親  
當勸耕金根而縹軌締冕而朱紘三推之儀既服勞於  
墾闢五祀之本亮來燕於齊明誠欲屢獲於豐年矧敢  
黷煩於上帝惟爾次祀可祈嗣歲受霜露風雨也既達  
氣於天地能聰明正直也宜饗誠於牲幣撫茲御耦意  
顯示於農先用以太牢敬幽通於血祭於是王后獻種  
甸師清畿宰夫庀事祠官致祈推精意之匪懈惟明靈

之具依今詠載芟與三時之不害願歌良耜終百禮以  
無違夫然重彼民天始吾帝藉惟方壇設瑁埴之敬則神  
倉有坻京之積著於月令則邦典無曠非尊地類則歲  
功何獲考文景之明詔遵禮攸行思龍棄之有功配祠  
來格厥後田鈎盾以為弄耕上林而匪恭既緩民事寧  
修禮容伊常祀之弗舉何靡神而不宗彼周室之中興  
猶廢大事隋儀之講惟祀先農异哉事雖勞於王躬化  
遂行於天下咸知貴於官稷矧敢厭於方社然則民和

而神降福焉繇祀與農而致也

五穀皆熟然後制國用賦

年穀皆入而制邦用

國欲制用穀宜有年俟農功之皆入乃邦財之敢專歲  
杪必登已審有無之數政柄在我允釐多寡之權原夫  
邦本惟人民天以穀受之田而俾養取以制而無瀆征  
求有藝既具在於積倉經費是程實有資於稍祿蓋以  
地利有荒而有治天時或和而或乖故無禾無麥而不一鮮  
多黍多稌之孔皆視耗與豐惟謹成于歲事量入為出



自允協于民懷若乃時三登而政平食四鬴而家給外  
有大田之稼內有萬箱之入多不為虐雖明上熟之饒  
度以賦民豈過取盈之急於是賦者歛者裁之制之物  
乃惟其有矣民寧至于殆而司徒令貢於土均示恭乃  
職太宰節財於九式亦貴其宜斯乃以民為心隨時立  
制因成隆殺之節相夫上下之歲循九一助之法固以  
適中以三十年之通斯能無弊彼或用侈為政弗仁佐  
邦利雖利矣而王制已壞國非國也而民心匪降李悝

以平糴取名第期昌富楊炎用兩稅變法愈革淳龐昇  
哉冠百辟之攸司輔一人而御統位獨崇於民極職乃  
均於邦用惟仁人共其心而無忝厥官可臻輿頌

金鑾賦

并引

蘇先生自中書舍人拜翰林學士門人李廌以金鑾賦  
賀之其詞曰惟金鑾之閼宇兮承明廬天門九重兮直  
帝居青雲邈為後塵兮紫清絳虛履泰階以布武兮瓊  
闕玉除侍上帝兮反真宰贊造物兮俯璿樞視下土以

為滓濁兮徜徉乎河洛之圖書代上帝以有言兮作典  
謨曷誰尸之兮疇咨明世之真儒惟令聞升聞于帝兮  
有臣曰蘇客曰是超然之先生耶惟超然之先生冠百  
世而稱傑操忠而秉哲執義而全節文章鮮儷于古今  
德行爭先于日月昔下士之興讒智相遼而欲軋不量  
厥才徒自黥削純然粹玉久苦埋涅濯之愈明始鄙羽  
雪於穆皇王登崇俊良爰自謫逐乃命作牧乃命為郎  
乃寘紫微乃居玉堂佩服絜以有輝輿衛儼以煌煌潤

色太平黼黻玄黃非先生之有榮實吾道之有光倚歟  
先生處斯金鑾為龍為光莫匪具觀饋天餉於寶床下  
晝漏於花塼錫尚衣之宮錦分御座之金蓮縉紳具云  
內相惟賢嗚呼官隨人以重輕職因時而貴賤爰置翰  
林近在貞觀伎卜雜進名同實眩吳筠太白久待詔兮  
竟無官封公輔樂天苦俸薄兮求兼府掾惟眷遇之無  
常故榮滯之相半乃若叔丈執義陰狠陽媚潛妖伏  
禍城狐山鬼二吳爭恩甚於火水恃為巢社公肆姦宄

惟茲金鑾兮待太平而後重惟茲金鑾兮待賢者而後  
貴倚歟先生處斯金鑾方江湖之放逐望魏闕以如天  
叫九閭兮靡訴濱九死兮永歎惟阨窮而處忌雖忠憤  
兮奚言今也侍帷幄兮朝夕納誨卻視象魏兮夙以在  
外況舉天下之重兮自任遺茲辰兮嘉會無使目為私  
人無止習為三昧夙志可宣兮時不易得時不易得兮  
蒼生跂踵而希澤將錫圭兮賜袞聊假道以茲職

金鑾後賦

并引

元祐元年冬今餘杭龍圖先生初入玉堂廌作金鑾賦  
四年夏小蘇先生九三丈復自地官貳卿入翰林為學  
士廌故作後賦欲以見儒者之榮兄弟之美而以尚之  
故曰後賦云其詞曰噫顓穹之祐民兮必降賢俾保釐  
雖降賢必有神兮詎俾下土而測知惟帝意兮靡忱故  
或儼兮或奇或千歲以相望兮或接蹟於一時或千里  
以相遼兮或同胞而連枝惟忠義以合符雖千一以共  
規卿雲景星醴泉靈芝晷瑞圖兮偶應矧常數兮可推

維伯仲兮俱賢異千祀兮膺期難乎伯仲之俱賢也粵  
若三叔謗旦有庠傲虞禽有膾肝之盜跖肝有鬻獄之  
叔魚義琰有義琛之劣世南有世基之諛瓜甘蒂苦源  
清流污蠹或毀堅瑕多敗瑜惟物情兮相戾焉人理兮  
可誣故有高陽之凱高辛之元並稱才子皆相賓門稷  
契之功萬世之隆莫之與崇夷齊之節萬世之烈孰並  
其潔漢酈商寄因緣勲勞楚季心布義俠名豪建慶兮  
以謹貴賢弘兮以讓褒上郡淑吏二馮藹聞吳都風流

妙稟機雲民庸兮襲志襲譽戰多兮萬均萬徹彥博大  
雅兮謀謨真卿杲卿兮義烈或武或文惟德惟哲伯仲  
俱賢才難道缺冀有於斯千載願閱惟二先生驚代稱  
傑坤維一方堪興效祥兩蜀鍾靈二江儲英峨眉薦祉  
並生世程凜然擢秀蔚在妙齡觀光來賓揆藻王庭三  
道奉宸忠貫杳冥言揚帝所日月俱鳴騰芳上國馳譽  
八紘間闕仕版顛沛周行忠義為質皦皦相望永矢不  
渝用行舍藏聖塗並驅方駕抗衡珪璋璜璧韶濩雲莖



世知俱賢莫能重輕放逐江海梗轉蓬飄白首兮于行  
雅意兮在朝歲不我與偃蹇下僚天定勝人德久自昭  
松柏兮御寒貫時兮弗彫雨雪兮霰零杲日兮睨消借  
來兮寶文回翔兮紫霄凌厲兮列缺閭風兮逍遙柱史  
兮載筆紫微兮贊書黼黻兮洪業鼓吹兮聖謨婆娑兮  
淵禁布武兮天衢金鑾兮玉堂絳闕兮清都明光帝居  
北扉禁廬璇題彫楹青瑣金鋪文林兮極寵命世兮真  
儒故二先生迭處更居昔在有唐危葉亂根懿之禕之

容身摛文通玄通微諭訛爭恩雖曰伯仲尸職金鑾朋  
邪比媚德忝厥官方我二蘇俱賢實難彼二龔二鮑兮  
惟僚二疏二謝兮惟族勢醜兮位均名齊兮義篤矧我二  
蘇同氣異息惟學與文並造聖域惟忠與信皆貫金石  
否泰慘舒皆共消息非聲氣兮偶同適與命符兮心迹  
名非實違名乃在德周旋嚴近代掌翰職朝廷昌兮屬  
承平一門慶兮兩名卿王國兮多賢儒冠兮預榮先生  
兮固有在寵兮弗驚方將比德兮稷契儷德兮元凱並

時登庸咸熙天緯羽翼兮王躬塤麓兮帝載鋪張兮所  
蘊康濟兮四海儻末光兮肯分庶餘暉兮永賴

武當山賦

并序

僕聞武當為名山舊矣元符改元之二年屠維單  
閼自鄴之平陵越明年上章執徐正歲元日自平  
陵往游世家古鄭故自以為太華逸民而均陽乃  
南鄉古郡於是設平陵丈人為對問以賦其事云  
太華逸民適乎南鄉值平陵丈人植杖道周敬修容而

問焉曰僕旅荊州歷楚囿按載籍諏耆舊遊遨鳳闕嘯  
傲峴首睨碑征南之坂捫鹿習池之岫策筌梅堦之嶽  
飲馬雙池之瀏雖清潤之可喜實奇雄之未覩比汴滄  
浪至于鄖郊卧岡走阜複沓平坳布若聚米沸若翻濤  
藏溪隱木險于幽都夾漢為塹隘比成臯邑或巖於鄭  
制獸或彊於齊孺雖弗逮乎鴈門已可方於虎牢第陵  
陸之可踐恨形勢之非豪何一山之巨麗俯列岫以彌  
喬卓犖倔起造天其高如鳳于翼如麟于毛如人之傑

如士之髦居衆莫揜拔于其曹吾弗知其何山也耶丈

人曰此吾邦之武當也惟茲奧區叟之所詳天樞隨旋

四七相望壽星步之

角亢曰壽星

乾緯是綱天根昭回抵于

龍亢

氏為天根

蒼龍左角距夫明堂

房心為明堂

下臨豫野故韓

之邦自河及荆綿亘沮漳方城為郭漢水為隍楚以之

為北鄙晉以之為南鄉河汾沃翼叔虞之唐逮重耳之

主盟此周索之所疆篳路啟林芊熊允荒洎變夷而為

夏輒由子而自王東姬不競霸府代強載書歆血胥會

衣裳乃封郵之徵境惟犇命之靡遑干戈間興以爭尋  
常介二邦之兩間茲屢為乎戰場秦噬六國拊背扼吭  
席卷方輿括于一囊韓社既墟徙治南鄉卯金典午下  
暨齊梁僑立始平名誣實違鬱悒百代今邁盛時以聖  
繼聖七葉重熙西越流沙東漸崑夷北撫幽都南控雕  
題際天所燾率郡縣之惟南鄉之故民其苗裔之所遺  
陶冶道化舊俗丕移昔尚豪夸侈靡以嬉今服禮訓惟  
儉惟儀昔喜任俠使氣敢為今鄉義方謹畏自持知射

利之去本咸盡力于耘耬悟漁獵之暴殄悉弦誦于書  
詩此並山之民其風聲性習之梗槩也茲山曰參設險  
自古或曰天中氣之所祖或曰仙室以真靈之攸處繫  
漢皇之訪仙遂名之以為武自我朝之御極常默輔於  
民主嘻為祥風噓為時雨薰為豐年兼此荆豫上原下  
隰墳壚壤土千流秩秩膏我黍稷漆千章其幽幽泉萬  
圃其膺膺水浮舩舩雲積廩庾良功纖續無苦締紆貢  
篚灌輸充牣王府農服先疇市藏大賈擾畜皆蕃於五

捋素封或比於萬戶惟靜重而安宅故無私而利溥此  
並山之地其土宜物性之饒美也予嘗窮山之所以為  
山乎肇自混沌初有太極暉胚結融元化埏埴清濁剖  
判坤闔乾闢大塊載持以土與石磅礴兩儀天地之骨  
無山其間何恃為力彼佛藏之文暨道家之書辨湏彌  
與鐵圍矜蓬萊與方壺或以為西天之所治或以為列  
仙之所居既莫究其信誕又安議其有無盍考乎職方  
所紀輿地之圖天孫惟東旁帶醫閭龜蒙云亭鄒陽之



眾祝融司南九疑蒼梧五嶺延袤百粵三吳金天太白  
股引天都終南褒斜連亘坤隅冀方常山上黨飛狐天  
下之脊燕冀之郭太室軒轅四顧諸夏太行伊闕襟帶  
洛社各據方而稱嶽以形勢之可詫觀此山之形勢敢  
論嶽以諭借勿論岱宗能小天下儼秀厚於恒嵩埒清  
雄於衡華可顏行而差肩或並驅而方駕彼設位之既  
尊此宜處乎流亞昔吾子之所觀徒闡葺於千里蔽翳  
者岵童顛者屺蜀者特寡而惇惇嶧者屬連而靡靡襲

至于三者惟名之以陟成止于一者惟名之以伍密則其奧也如堂之可處盛則其衰也如防之禦水曰章者下歆而上正曰隆者宛中而四起雖大而卑也以坡陁而為扈雖衆而小也以瑣細而為歸厥類參差而不一是皆界邱而灑迤大頂居中衆山來宗屹如長人撫摩諸峯獲附麗而邇者遂夤緣而亦崇卻顧醜夷莫之與隆傍立而九若分職佐理者曰卿寺之列前嚮而三若視品同秩者曰槐府之公侍側若承顏而溫敬者則以

為世子居內若儼體而順附者則以為後宮曰主簿者  
曲拳有文墨小有司之意曰將軍者岝嶸有介冑不可  
犯之容堆曰萬斛若倉箱之積崖曰竈門若膳羞之饗  
銳前端方若柱史則惟筆鋒擁後合沓若車騎則惟五  
龍曰朝趨者或右或左或南或東若子男若附庸若臣  
若屬若賓若從若寃弁劍履之序立若旂旂和鸞之會  
同此三十六峯之形葉葉乎與五嶽之同倫也泛觀茲  
山韻粹氣整巒岼奇峯截嶽峻嶺植若宿邸之主隱若

塞門之屏騰凌閭風滅沒倒影斗柄垂焉而可挹日御  
過焉而莫騁俯其陁則截然而斷下欲臨乎無地仰其  
椒則聳然而上升恐摩乎有頂參斗龍湫宅於絕境類括  
蒼之鑑湖同太華之玉井雲移一勺可雨萬頃浸脈千  
仞下為天池天池汎流瀟乎巖陁懸若匹練散為明璣  
飛流濺沫走派成溪黑谷冥冥翠壁巉巉竿棧履空繚  
通下巖徑若窮而復永石欲墮而相銜樅檜枯柏豫章  
梗楠萬牛莫曳匠石所瞻蔦蘿轆轤篠簜糾攬細大薈

鬱紫翠相參蔽虧掩苒曛晝凝嵐林集孔翠穴產鸞鷟  
歟晨風擊鷲鸚菊花黃鵠輪目異鵲息運海之鵬巢啖  
天之鶴蔚然蓬蒿焚然叢薄亦有乎搶榆之鳩啄場之  
雀鷺鷥徘徊烏鳶栖託也赤草植枿醜石磽确玄熊咆  
蒼兕攫虎吟風而振迅豹隱霧而溟漠嚙鐵芒毛之貊  
噉獸鋸牙之駁介然之蹊坦然之壑亦聚沐猴亦隱狐  
貉鼯飛而鼯啼鹿奔而兔躍也天地寶藏振古逮今璞  
韞萬鎰之玉礦化三品之金璀璨琅玕陸離璆琳丹砂

納錫文犀為琛蘭芬薌而盈畹芝艷翕以成林紫蔓玉  
膏則有仙花之薯縹莖雪指則有肖人之參檠桑輅楷  
可以足武庫之弧矢梧桐杞梓可以中清廟之瑟琴若  
乃據洞谷之勝玩林泉之幽暑袵芰製寒擁羊裘飯糗  
以為食粹茹以為羞欲礪齒則漱石欲滌耳則枕流著  
書自怡邈世無求此癯儒肄業而巖以孔子為名者也  
悲朝菌之晦朔慕靈椿之春秋媁龍虎於丹鼎餌日月  
於玉樓友廣成捐浮丘蛻迹林壑于焉淹留此戴生不

返能繼徐福之迹關令求道終從藏史之遊而幼安希  
夷之徒各以其居而名其巖也面壁作觀問法立雪觀  
墮空之落蕊悟澄潭之印月境靜心虛身閑相絕不染  
色空究竟生滅此忠公安禪定之心玄奘註釋經之說  
而七師佛子之徒各以其居而名其巖也飛錫御風隨  
錫而東越蒼嶺踰崆峒來駐于茲若將從容神祈徒處  
回鴈南峰錫摧狼嶠故巖遂空此思大之禪庵也芘芻  
誦經有隻日聽曰吾非人實處東溟敢獻宅室為師戶庭

潭空巖出上下杳冥此俞公之龍室也凡茲諸巖或完  
或隳悵昔人之安在棄舊隱以如歸或蒼苔之封戶或  
垂蔓以穿扉匪直時遷而事異抑亦物異而人非但餘  
梵宮炫煥翠微碧瓦鱗布朱欄翬飛蓋故唐太一延昌  
之舊刹蕭代二帝用以奉國師之隆儀我宋太宗益宏  
故規錫以宸翰耀於璇題定陵昭陵復寵賁之頒天章  
日星之集拓寶文龍鸞之碑湛恩波于河漢燦光華於  
斗奎草木欣榮天龍護持裕陵妙天人之學聽臣民之



祈詔其道場俾奉禪者多方開士海會雲棲四后之德  
民曰惟宜與山俱傳與天斯齊此皆山中之故事圖經  
之所紀吾子可閱而知者也雖然書生執迂方冊是取  
烏知簡編筆削罔據惟咨故老折證古語圖經可恨弗  
載真武雖祀烈威名字弗著子其志之傳信自汝惟昔  
神君隱耀屏處實鍊陰陽游息洞府惟勇義而果德誓  
馘毒而禦侮功聞玄天白日仙去上帝將之升列四輔  
統虛危而肅殺直元枵之凝沍躡靈蔡以靜鎮馳率然

而焱怒寶旌六纛天駟萬旅玄冥奉輿豐隆先路巨靈  
右戎夸父為御伐鼓崑崙弭節玄圃敷福施刑調節寒  
暑遊徼下方歸侍帝所時顧舊山千載旦暮當攷玉文  
祠以琳宇無文咸秩矧此宜舉祀典報功匪私其人扞  
裁禦患興雨致雲或功垂於後世或德感於烝民事雖  
既往其迹已陳利及方來其澤日新民俎豆之其情則  
親抑有太山之麓大川之濱國為祗而載祀實異時之  
名臣主錢塘之潮汐乃胥門之伍員掌洞庭之重湖惟

伏波與靈均壽亭亭於玉泉西鄉祠於郢津制一江於  
灌壩祭冰子而自秦伊南州之孔明乃威力之茲神偉  
歟是公惟人之龍天矯玩世卧於西隆游心義皇之域  
味道周孔之宮鄙千駟輕萬鍾憤阿瞞之大猾藐景升  
之狂童繫用舍於彼天閱經綸而弗庸何玄德之合契  
因徐子以為容卻雖再而猶顧我愔然而宥從曾不陋  
乎庸蜀欲儼迹於漢中礪一州而抗八卒鼎峙以爭雄  
觀夫戴后牧民撫軍董國以義行仁以刑輔德喜焉以

禮樂為具怒焉以干戈為飾託孤不欺無愧於曲阜行  
罰無怨愈賢於駢邑馭英雄則關張奮其武登雋良則龐  
蔣善其職兵銜恩而效戰木運糧而足食決籌筭於帷  
幄付笑談於巾幗彌年耕渭而卒走仲達五月度瀘而  
屢禽孟獲功高任重心勞身瘠委塵編之國誠遺濤江  
之陣蹟公歸九原德名彌白子觀此山去天咫尺名曰  
太嶽必以峻極儲英毓秀宜產賢特豈是公之生也於  
焉而降神及厭世而歸也於焉而廟食同符甫申可貫

今昔與荆蜀之共祀非宇宙之異域故威烈之殊號乃  
武靈之同蹟愧文獻之莫徵矧人神之敢惑今天子治  
鑒太清道法自然合明於日月體德於坤乾文德充四  
表武節暢八埏仁動植昭天淵豐登屬續珍符羅駢神  
璽出地榮光燭天山中之民或以謂瞻象瑜之烜耀與  
卿雲之眇綿巖出器車澗流醴泉蓋以當五百歲之運  
邁七十二君之前數有四靈之畜貢有三脊之管是宜  
舉巡狩之典稽封禪之篇嘉告丕績升中名山輯圭瑞

奉牲牲泥金檢玉燎糈升烟市納賈邦興賢攷律歷禮  
高年雖駐蹕於方嶽亦望秩於山川惟吾民之望幸豈  
此山之無傳惟吾子其賦之以俟夫采詩之官太華逸  
民曰諾僕將言於是結社蠟敝屣披荆榛褰裳泉石緣  
雲而升弗遑食息趺足龜手悸心殫力徧詣其處決日  
乃悲歸謂丈人叟語可績告成紀功詞臣有職草瑩賤  
儒所不敢識

松菊堂賦

賦曰冉冉兮運征物隨化兮俱逝雖品類兮萬殊率變  
遷兮一氣矧草木兮代謝制陰陽兮榮瘁惟凡木之柔  
兮松則有心惟衆草之弱兮菊則有芳鍾靈氣兮異稟  
挺正操兮能剛若乃金行正秋玉律司商清風戒寒殺  
氣賈霜菅茅蕭艾委靡玄黃蕪葭蒲荇慘黯蒼蒼菊於  
斯時敷華芬薌呈孤芳於樊圃明麗彩於秋陽葩藹葳  
蕤附屬苞萼寧共槁以摧仆詎紛披兮搖落如幽人之  
素履係所遇而無忤保永正以終始善長處乎約樂若

乃氷堅風壯日道北陸雪霜總至水泉下縮椅桐杞柳  
柔脆先衰枳棘栲栳堅緻何支松于斯時充茂蕃滋衆  
奄奄兮早彫獨青青兮自持柯葉締固貫時無易自咫  
尺兮彊立干雲霄兮蔽日如至人之游世罔拘累乎信  
訕既才全兮德盛閑萬變兮如一粵有達士秉德安育  
訓義方於庭壺振惠慈於邦族行素封之萬戶間蛾眉  
於列屋敞樂園以娛賓峙宏堂而游目飾榮觀於臺沼  
萃衆芳之草木函枝莖於汴雒遷根莖於吳蜀森喬林



兮紫翠眩珍叢兮紅綠憎性遷而質變獨知心兮松菊  
春向闌兮芳歇火已流兮暑徂觀百卉兮左右閔將槁  
兮株枯俯連錢兮黃金仰修葢兮紺羽擷露英兮泛醴  
折雲梢兮代塵想魯詩于徂徠晞壽侯于南陽湔秦封  
之濫爵徵于夢之佳祥追元亮之風誦天隨之章聊日  
涉兮觴詠樂成趣兮未央方善頌兮善禱豈三徑之就  
荒也邪

龍魔賦

陟神嵩之岑寧兮背東址之陂陀躡緣雲之磴以左旋  
兮上有絕壁之嵯峨畜雲雨之液以瀦聚兮不為斯干  
鍾煙嵐之秀以蘊結兮寔為卷阿幽然九潭黯然澄波  
爰有九龍各居其淵龍姥字之故馴以訛維龍之姥神  
變實多或為封豕或為長蛇或為大厲或為姣娥匪噬  
匪毒喜為戲魔潭濱之民習於見聞匪苟為魔必魔令  
人比有大士習於桑門精進甚勇歲月已勤誅茅為廬  
介於潭濱龍忌且媚義弗宥賓肆其憤心噴為怒雷雷

電馳騁風霧糾紛日月蔽輝宇宙為昏俄為巴蛇千尋  
雪鱗搖毒怒視煙飛火燃鋸牙舟腹巨象可吞欲魔若  
人望戶以犇首大於戶進不可前古如虹蜺其利如鋌  
忽搖搖而入戶兮噬頂領而垂涎彼方屏氣聽息宴坐  
安禪游心於無我寄我於自然天地皆定萬物不遷何  
生何死何喪何全觀者為慄定觀自安龍悟其妄輒悔  
而悛恍兮忽失蓋慚以旋嗟夫天用莫如龍兮介蟲之  
君動與天通兮致雨而興雲以變以化兮乃為魔而甚

勤妄喜妄怒兮何自悔其能神恃不可以制畜故恣戾  
而匪循烏在其能潛能躍能飛能伏而比德于聖人潭  
濱之民曰凡魔之族詎止龍哉紛紛斯世多惡端正令  
能相競名能相勝勢相盛功相病其魔有甚於龍姥厥  
口善汙於賢聖或忌人德或惡人修翕訛張俯覆用為  
仇四國流言於姬旦宋桓施厄於尼丘市人毀參而疑  
曾母臧倉沮孟而止魯侯樂侯喪成功於即墨武安賜  
樂劍於杜郵乃及絳侯安漢疑行縣而為亂條侯襄難

謂地下之必叛董相禍興於步舒賈傳被抑於絳灌陳  
甘沮功於稚圭蕭劉遭讒於恭顯燕蓋毀霍薏苡誣援  
在唐名臣亦多間隙無忌元舅敬宗罔以大逆鄭公忠  
良彥博浼以形迹德宗猜忌武曌羅織盧杞薦賢高閹  
譖白李西平之勇智延賞敗其謀贊皇公之剛明僧孺  
毀其績故小人之為魔惟必累於正直魔正直之一二  
勝庸凡之累百其心曰魔於庸常我魔匪彊惟魔正直  
可使彼傷彼方砥礪日務自異魔之何如恐異於已魔

之遂屈乃協厥意魔之益勵終異厥類吾聞是言有感  
余志以魔為師維魔之畏俯仰天地奚作奚愧

仕而優則學賦

君子之仕  
優則為學

仕欲行道功期致君既政優而能裕當學殖以惟勤初  
委質以在公有茲餘力宜潛心而師古益務多聞且夫  
志於聖人不苟之君子謂昔以學優也故得從政今以  
仕優也復將窮理雖匪懈於夙夜貴念典於終始臣工  
無曠已就列而効能天爵弗忘庶存誠而為已位既不

忝政宜克施智明效速兮才有游刃心清事省兮日寧  
廢時幸燕安而暇豫忍偃仰以棲遲業欲廣也學宜聚  
之敏則有功已臨民而易簡達不離道矧役志於嬉墮  
然則砥行以立名非苟容而從仕求益則不如學也持  
祿則徒勞人爾朝雖聽政兮晝則訪道而不厭夜則安  
身兮夕猶修令而未已居之綽綽固無從事之獨賢進  
以乾乾豈俾古人之專美豈不以仕惡妄進學當敏修  
彼外物也或不可必此放心也獨不知求況已寘周行

之貴又期聞大道之優經籍益耽美成功之杜預弦歌  
不輟歎治邑之言游以故雖吏事之猥并用儒術以緣  
飾經義可決於訟獄官府奉行以法則馬融絳帳傳授  
詎廢於牧民董氏書帷講誦奚聞於弛職若乃大官大  
邑也身何以庇有社有民也學何必為被其服而德不  
稱尸厥位而事罔知鄙無遠謀動有面牆之誚暗于成  
事夫何製錦之宜於戲君總萬幾道期先覺猶遜志以  
愛日尚儲精而務學矧臣工仕優而無所用心可不思



於約卓

擬試車服以庸賦

臣有功者  
錫之車服

君不僭賞臣惟有功錫車服之邦禮飾威儀於爾躬軒  
寬有輝允示龍光之著事言可績用昭閎閱之隆臣有  
膏澤加於生民勲勞被於天下賜以弓矢鉞鉞未足旌  
其能矣紀於旂常彝鼎未足稱其美者惟命車命服分  
寵賚於本朝可賞善賞功俾榮懷於諸夏夫以巾車陳  
六等之制司服辨九章之儀樊纓采就之蕃飾絺繡藻

繪之彰施金輅象輅兮功異小大袞冕毳冕兮義存等  
差凡所別者將因表之不可假人固慎持於名器用以  
藏禮寔顯答於猷為以爾為民軌儀是用錫之車以爾  
積民衆帛是用錫之服安其體以佚豫章其身而吉燠  
駕彼元牡則儀衛威重副以赤舄則禮容敬肅得輿為  
美方將世選爾勞在筭無譏時乃自求多福四岳羣后  
九官庶臣言敷納而咸在效明試而具陳膺此異數示  
於衆人錫命文侯爰示東周之烈褒賞申伯非惟元舅

之親彼蓋求於侯也貢之則非索於市也粥之何有吾  
既重於施報汝毋輕於授受輜乘寵桓榮於少傅師道  
攸尊黻冕拜士會於中軍君恩益厚若乃以訟而受服  
舐痔而得車負乘致寇者在是不衷災身者有諸鶴乘  
軒而厚祿鶻在梁而晏居載驅無禮義之心以盛為辱  
采菽刺侮慢之意雖予猶虛异哉聽彼和鸞觀夫襲褐  
慕崇賢之令典勉勤王之嘉績致爵位而安富尊榮行  
見尚方之申錫

湯刑勸善賦

湯之用刑亦能勸善

古有哲后時稱聖湯能用刑而俾義致勸善而知方法  
欲禁非惟馭威而審克民皆厲節遂化性於循良原夫  
民初秉彝心知好善勸必加賞也賞或不給勸必見利  
也利之或鮮况乃肇修人紀始建刑典惟明德而慎罰  
不爽厥麗故砥行以立名咸知自勉彼以法主忠厚意  
存哀矜重有致於無赦薄或示以小懲改過則畏而弗  
敢遷善則恥夫不能釋彼無辜自俾非心之格殖夫有

禮咸期美行之興實由禁令有倫奇衰勿縱以聖敬之  
明也斯固不濫雖孥戮之誓也夫豈輕用善亦期於無  
刑必也使之無訟儆于有位訓蒙士以恭行在予一人  
率多方而康共然則刑所去者示之使避善之取者道  
之使思知其畏而戒懼也因其警而誘掖之義征葛而  
用甲兵攸徂相慶仁祝網而及禽獸罔或遐遺夫惟彰  
信以無私胥然而咸勸迄徧為於爾德在簡孚於常憲  
克用三宅庶不犯于有司無陷十愆宜敬修其可願若

乃制短長之命妄輕重之刑非惟中而克允第淪胥而  
不庭彼且咨怨尚何輯寧異時革夏之寬剛柔匪濟後  
世從商之論名實匪輕異哉稽古之君御邦立辟慎所  
施而必中俾允懷

原闕

銘

匏壺銘

匪金匪玉匪繪匪飾用因汝器器本汝質汝質惟虛天  
畀汝德母因所受妄矜為實實勿勝虛實勝當溢盈虛

無常人自損益毋敗虛德是惟汝則

燕勺銘

獨核木燕中物也

北海之濱不周咨堯不周何有厥木惟喬製為長勺匪飾匪彫堅理錯節紫質纖杓單于修貢以奉王朝公劉草創酌之用匏顏氏屢空飲之用瓢逸民困窮用汝匪驕相我獻酬以勞漁樵

貞明古劍銘

并序

李道士有朱梁貞明中古劍一口貞明乃友貞之年號

余以此劍雖奇不足貴作此銘以誨之孰曰神物神不可屈匪人而用匪時而出義不苟全寧缺寧折汙亂而全為妖為孽鏖鉞悲鳴怨處豐城既離古獄遂躍延平赤帝之精久憎晉寓武庫焚如穿屋飛去貞明之梁實惟寇攘父子兄弟推刃相傷汝當斯時不躍不飛弗屠金忠弗割友珪文章燦然雖寶奚為後當慎旃過為汝掩屬茲平代兵氣消歛槃水奉汝可警羣諛全汝靈氣閱汝芒焰肅保天威永拒姦僭小用不祥為天下劍



芝杯銘

病木之節拳贅弗枝盤英結液礫礫離奇剖斲擎承宛  
若靈芝制為野杯逸民是宜右嵩左隗箕陰潁湄德秀  
吾廬巢許是期惟巢與許挹茲酌茲三秀之德汝當象  
斯母若兕觥母若漏卮貴之比玉敬飲弗揮

蟠尊銘

惟汝輪囷匠石舍旃不材為幸宜永厥年孰來相之以  
汝為尊釗心就刑遂戕汝天輪囷為累視醜為妍來自

百粵登我素筵毋慕犧象青黃絢鮮郊廟之用溝中之  
捐暨汝在茲悉非故然南有澗濱未知孰賢